

Cup svizzer: CB Surses gudogna cunter Laax

Vantgatschintg minutas furioso on tanschia

Matia Demarmels/FMR

Igl CB Surses ò gudagnea igl aprem gi dalla prerunda digl cup svizzer. Gist cun 5:1 ò la squadra sursettra battia igl CB Laax. Per l'aprem'eda ins ò survagnia en'impresiu, scu tgi la nova furmaziun tactica pudess funcziunar e purtar anavant igl CBS.

Chesta stad ò la squadra digl CBS intensiv igls trenamaints. Treis gedas l'emda on igls giueders da Philipp Berri liia igl calzers per sa parager sen l'aprema staschung ainten la terza liga. Sonda seira allas 19.00 ò igl arbi-ter alloura do liber igl aprem gi serious dal- la staschung nova pigl CB Surses. La squadra sursettra è neida beneventada digl CB Laax sen la piazza da sport «Lag Sec». Las cundizi-uns meteorologicas on regurdo pitost agl «lag» tgi ad en li «sec». Igl è pluia durant 90 minutas da tschiel rot.

Nova furmaziun tactica

Malgro las cundiziuns difficilas on tottas dus equipas catto bagn igl schlep. Durant las apremas 15 minutas on igls bung 30 aspecta- tours vasia belas acziuns da tottas dus varts. Crudo an igl è, tgi igl CBS vign a freida veapi bagn cun la nova furmaziun tactica. Siva digl gi da preperaziun cunter Celerina è igl trena- der Philipp Berri betg anc sto satisfatg cun las midadas tacticas: «Oz ègl gartagea per



Impressiuonant: Julian Jenal ò marco 4 gols an 25 minutas. Chegl è betg anc gartagea a blers giueders digl CBS.

l'aprem'eda scu chegl tgi lagn. Nous vagn pero da luvrar anavant, da neir anc pi equilibros e pi constants durant 90 minutas», ò el managea curt siva digl gi. La squadra ò permangs dad implementar en 3-5-2. Vot deir: igl CBS dat da nov cun treis defensours centrals e dus giueders tgi èn responsabels per las varts. Chels ston far pressiu anavant,

dastgan pero er betg tralasher lour pensums defensivs. Sonda passada on Linard Augustin ed Ivano Simonet do sen chella posizun fitg strantga. Tots dus èn sa santias bagn ed èn nias tar differentas schanzas graztga a lour dinamica. Schi gartegia da neir anc pi effizaiants davant igl gol, saron els chesta staschung privlous pigls defensours adversaris.



Ivano Simonet ò persuadia ed ò annuntzia las sias ambiziuns per en plaz ainten la furmaziun d'antschatta digl CBS.

«Oz ègl gartagea per l'aprem'eda scu chegl tgi lagn.»

Philipp Berri



Enrico Carisch è sto luvrou cun correr 10 kilometers an 96 minutas.

Fotos Matia Demarmels

«Nous lagn surtot
esser pronts sen
l'antschatta dalla
staschung regulara.»

Philipp Berri

One-Man-Show

A parteir dalla 20avla minuta ò alloura Julian Jenal procuro per divertimaint segl Lag Sec. Ainfer angal diesch minutas ò el sagiatto en hatrick. Gl'amprem ò el profito d'ena seria da sbagls dalla defeisa adversaria. Otg minutas pi tard ò igl gioven om da 20 onns laschea star dus adversaris avant tgi marcar igl sagond gol cun en bel colp da bung 25 meters. Dus minutas pi tard ò el marco igl sies terz siva dad aveir retschet en pass dad Adriano Simonet. La 45avla minuta ò alloura igl defensor da Laax, Gian Luca Coray, tutgia en penalty e marco igl 1:3. An chel mument ins ò pudia chintar cun ena sagonda mesadad plagn tensiun. Gis da cup on ancunaschain-tamaintg «atgnas reglas» e procuran chi e lò per vioutas nunspitgeidas. Pero betg chest'eda: anc avant la pòssa dalla mesadad, ò Julian Jenal marco igl sies quart gol e decida igl gi. Puspe è el sto mengia spert e mengia agil per la defeisa. Ena finta, en ulteriour croc ed en schoz exact. Igl conguieders, igls aspectatours e (mattagn) er igls adversaris èn stos incantos digl om da Samignun tgi trenescha gio passa en onn cuagl CBS. Cun aveir survagnia pir dacurt igl pass da giuieder ò'l do sonda passada egn digls sies amprens gis.

Proxima fermada: Littenheid

La sagonda mesadad è alloura stada pi pac spectaculara tgi l'amprema. Igl CB Surses ò laschea circular bagn la balla ed ò controllo igl gi. Cunchegl tg'igl CB Laax ò catto duple stabilitad ainten la defeisa, en las schanzas neidas ensatge pi raras. Manuel Simonet ò marco igl 1:5 ainten la 73avla minuta. Igl top-scorer da gl'onno passo è nia mido aint curt avant. Dumengia proxima dattan igls Sursetters la sagonda prerunda digl cup svizzer cunter igl FC Littenheid. Propi serious vignigl alloura igls 21 d'avost, sch'igl FC Sargans è giast sen la piazza d'ava a Tinizong, pigl ampren gi digl campinadi. Las prioritads èn cleras per Philipp Berri: «Er schi victorgias aint igl cup èn belas – nous lagn surtot esser pronts sen l'antschatta dalla staschung regulara».

CBS 2 ò viout igl gi

Dumengia passada ò la sagonda equipa digl CB Surses gudagnea en gi da preparaziun cunter Tusang/Tgazzas cun 4:5. Siva dall'amprema mesadad vasevign or tot oter tgi bagn: igl CBS è sto davosaint cun 3:0. Cun dus gols da Raphael Poltera ed egn dad Aurel Tschanner ègl gartagea da turnar anavos aint igl gi. Siva da chegl tgi Tusang/Tgazzas ò gia marco danovamaint igl gol d'avantatg, on Ivano Simonet ed Aurel Tschanner viout igl gi curt avant la fegn. Aurel Tschanner, tgi è trenerer digl CBS 2 e gioia per part er sez, è cuntaint: «la va gia plascheir da vaseir en'equipa tgi ò cumbattia anfignen alla fegn. Chegl mossa tgi nous ischan sen bunga veia per chesta staschung.» (fmr/md)

GRISCHUN

Minus dad 11% tar pernottaziuns

Igl cantun Grischun ò dumbro 2,2 milliuns pernottaziuns igls amprens seis meis digl 2021. Cumparegla cun la media da tschintg onns constatescha igl Uffezi federal da statistica en minus da radond 11%.

An igl croda tgi cunzont duple gliout svizra ò perotto durant chel taimp aint igl Grischun. Cumparegla cun la media digls davos tschintg onns monta igl plus da giasts svizzers a 21%. Anc pi marcant è igl plus tar giasts dalla Pologna, tar chels monta igl plus a passa 300%. La pi gronda sperdita cun en minus da var 97% fò igl cantun Grischun tigl giasts dall'Asia.

Cumparegla cuagl onn da pandemia ò la hotellareia grischuna nudo igl zarcladour radond 36% duple pernottaziuns, numnadamaintg passa 300 000 pernottaziuns aint igl Grischun. An Svizra ò la hotellaria perancunter nudo l'amprema mesadad digl onn ena sminuaziun da pernottaziuns, numnadamaintg da 30% cumparegla cun la media digls davos tschintg onns. Tot an tot ègl do an chel taimp radond 11,4 milliuns pernottaziuns an Svizra.

La pi gronda sperdita fò igl cantun Genevra. Chel registrescha ena sperdita da 67%. Igl pi grond augmoint cumparegla cuagl davos tschintg onns dattigl aint igl cantun Tessin, cun en plus da 43%. (rtr/fmr)

GRISCHUN

Green Deal pigl Grischun costa 67 milliuns francs

La regenza grischuna ò preschento marde passo l'amprema etappa digl plan d'acziun Green Deal pigl Grischun tg'ò per meira da cuntanscher anfignen igl onn 2050 «netto nolla emissiuns da gas cuagl effect da sera». Scu amprema etappa per rinforzar maseiras gio instradadas vign dumando agl Cunsegl grond ainten la sessiun d'otgover en credit d'impegn da 67 milliuns francs. Cun chella somma duessan neir rinforzadas prioritarmaintg maseiras existentas tgi on en effect spert e tgi na permettan betg en'adattaziun dalla lescha per tg'ellas possan neir realisadas. (cdm/fmr)



Foto Madlaina Capeder